

दिनांक 27.10.2025

समय: 18.45 बजे

आकाशवाणी जयपुर—अजमेर

प्रादेशिक समाचार

- निर्वाचन आयोग राजस्थान समेत 12 राज्यां अर केंद्र रा राज वाळा प्रदेशां मांय वोटर लिस्टां रा विशेष गहन पुनरीक्षण रो ऐलाण कीनो।
- बारां जिला री अंता विधानसभा सीट माथे उप—चुनाव सारु 15 उम्मीदवार मैदान मांय।
- केन्द्र सरकार राज्य मांय पाणी भेलो करण सारु 'टांकां री योजना' ओजू सरु करण री मंजूरी दीनी।
- शिक्षा मंत्री मदन दिलावर कह्यो—राज्य मांय सरकारी स्कूल एक अप्रैल ऊँ खुलेला।
- प्रदेश रा मौसम मांय बदलाव सागे ई न्यारा—न्यारा जिलां मांय बिरखा।

000

राजस्थान समेत 12 राज्यां अर केंद्र रा राज वाळा प्रदेशां मांय वोटरलिस्टां रो विशेष गहन पुनरीक्षण दूजा दौर मांय कर्यो जावेला। मुख्य निर्वाचन आयुक्त ज्ञानेश कुमार आज नई दिल्ली मांय खबरनवीसां ने आ जाणकारी दीनी। वे कह्यो के पहला दौर मांय ओ काम सफल रह्यो है अर दूजा दौर मांय इण ने न्यारा—न्यारा चरण मांय कर्यो जावेला।

000

बारां जिला रा अंता विधानसभा हलका मांय उप चुनाव सारु सात उम्मीदवार नाम पाछा ले लीना है जद के एक पर्चो खारिज कर दियो ज्यो, ज्यीं पाछे अब ई उप चुनाव सारु कुल 15 उम्मीदवार रह गया है। आज नाम पाछा लेवण रा आखिरी दिन 5 उम्मीदवार नाम पाछा लीना। नामपाना दाखिल करण अर पाछा लेवण रो काम पूरो व्ह्यां पाछे चुनाव प्रचार मांय तेजी आवण रा आसार है। निर्वाचन विभाग ई स्वीप कार्यक्रमां रे मार्फत वोट जरूर देवण री अपील कर रह्यो है। ध्यानजोग है के उपचुनाव सारु 11 नवंबर ने वोट पड़ेला अर 14 नवंबर ने वोटों री गिणती करी जावेला।

000

केंद्र सरकार प्रदेश मांय पाणी भेलो करण सारु 'टांकां री योजना' ने ओजू मंजूरी दे र रकम जारी करण रा हुकम दीना है। मुख्यमंत्री भजनलाल शर्मा आज नई दिल्ली मांय केंद्रीय कृषि मंत्री शिवराज सिंह चौहान सागे मुलाकात पाछे आ जाणकारी दीनी।

बातचीत रे दौरान केन्द्रीय कृषि मंत्री शिवराज सिंह चौहान कह्यो के ई सारु केंद्र सरकार राज्य ने हर संभव मदद देवेला।

ई सागे ई सूक्ष्म सिंचाई योजना रा तैत मदद री रकम ई 20 ऊँ बधा र 40 फीसदी कर दीरीजी है। इण ऊँ पैली मुख्यमंत्री भजनलाल शर्मा आज प्रधानमंत्री नरेंद्र मोदी ऊँ ई मुलाकात कीनी।

000

प्रवासी राजस्थानी समुदाय सागे बातचीत कर र वां ने राज्य रा विकास मांय भागीदार बणावण सारु न्योतो देवण बाबत् कोलकाता मांय 'प्रवासी राजस्थानी मीट' राख्यी जावेला। 10 दिसंबर ने जयपुर

मांय राख्या जावण वाळा 'प्रवासी राजस्थानी दिवस' कार्यक्रम मांय शामिल व्हेवण रो न्योतो देवण सारु मुख्यमंत्री भजनलाल शर्मा री अगुवाई मांय एक दल काल कोलकाता जावेला।

000

आला आई.पी.एस. अहलकार गोविन्द गुप्ता आज भ्रष्टाचार निरोधक ब्यूरो रा महानिदेशक ओहदा रो कामकाज संभाल लीनो। ई मौके वे कह्यो के भ्रष्टाचार ने बिलकुल बर्दास्त नी करण री नीति रे मुजब साफ-गोई सागे तुरत कार्यवाही म्हाणी सब ऊँ मोटी ताकत है। श्री गुप्ता कह्यो के जनता रा भरोसा ने और मजबूत बणावण माथे वां रो खास ध्यान रहवेला। ए.सी.बी. रा नुवा महानिदेशक राज्य री जनता ऊँ मुफ्त हेल्पलाइन नंबर या व्हाट्सएप नंबर माथे शिकायतां दर्ज करावण री अपील कीनी।

000

राज्य मांय अब स्कूलां 1 अप्रैल ऊँ खुलेला। शिक्षा मंत्री मदन दिलावर कोटा मांय आ जाणकारी दीनी। वे बतायो के सरकार री सरकारी अर गैर-सरकारी स्कूलां रा विद्यार्थियां सारु एक सरीखी पोषाक लागू करण री योजना है। मंत्री कह्यो के स्कूल री ड्रेस मांय टाई नी राखी जावेला।

000

झालावाड़ पुलिस सरकारी योजनावां री रकम उड़ावण वाळा एक अंतर्राज्यीय साइबर गिरोह रो भण्डाफोड कीनो है। झालावाड़ रा एस.पी. अमित कुमार बतायो के 'ऑपरेशन शटरडाउन' रा तैत करी ज्यी ई कार्रवाई मांय पीएम किसान निधि रा स्टेट नोडल ऑफिस ऑपरेटर समेत छह आरोपितां ने गिरफ्तार करी ज्यो है अर ग्यारह हजार बैंक खाता फ्रीज करी ज्यो है, ज्यां मांय करीब एक करोड रुपया जमा है। गिरफ्तार करी ज्यो सरकारी कर्मचारियां माथे वां री ऑफिसियल आईडी रो बेजा इस्तेमाल कर र पीएम किसान सम्मान निधि रो फायदो लेवण सारु अपात्र लोगां री लैंड सीडिंग, ओटीपी बाईपास अर अकाउंट एक्टिवेशन करण रो आरो है। एस.पी. बतायो के गिरोह माथे आपदा प्रबंधन पोर्टल ऊँ मुआवजा राशि हड़प जावण अर करोडां रुपया री धोखाधड़ी रो आरोप है।

000

राष्ट्रपति द्रौपदी मुर्मू, उपराष्ट्रपति सी पी राधाकृष्णन, प्रधानमंत्री नरेन्द्र मोदी अर गृहमंत्री अमित शाह छठ पूजा री शुभकामनावां दीनी है। राष्ट्रपति आस जतायी के छठ पर्व हर एक री ज़िन्दगी मांय सुख-समृद्धि लावेला। उपराष्ट्रपति कह्यो के ओ पर्व सगळां ने सूरज भगवान अर छठी मैया रो आभार जतावण रो मौको देवे है। प्रधानमंत्री नरेन्द्र मोदी ई सोशल मीडिया पोस्ट रे जरिये डूबता सूरज ने अर्ध्य देवण री रीत ने अद्वितीय बतायी। गृह मंत्री अमित शाह ई सोशल मीडिया पोस्ट रे जरिये कह्यो के ओ पर्व सगळां री ज़िन्दगी मांय नुवी ऊर्जा अर समृद्धि लावेला। राज्य मांय ई केई ठौड़ां छठ रो पर्व हरख अर सिरधाभाव सागे मनायो जा रह्यो है। म्हाणा भरतपुर खबरनवीस बतायो के पूर्वांचल रा लोग जलाशयां मांय उतर र डूबता सूरज ने अर्ध्य दे र सुख-समृद्धि री कामना कीनी।

000

राज्य मांय चक्रवाती तूफान "डवदर्जी" अर पश्चिमी विक्षोभ रा असर ऊँ केई ठौड़ां भारी बारिश रा आसार है। ई बीचे करौली, बारां अर चित्तौड़गढ़ समेत केई ठौड़ां काल रात ऊँ ई रुक-रुक र बिरखा व्हे रही है।

राजधानी जयपुर, माउंट आबू, डूंगरपुर, भरतपुर, डीग अर पाली जिला मांय ई आखा दिन छाटो-छिड़को चालतो रह्यो। दूजी कानी चूरु, बालोतरा अर बाड़मेर मांय आखा दिन बायरो बाजतो रह्यो। मौसम केंद्र, जयपुर रे मुजब आज अर काल कोटा अर उदयपुर संभाग मांय कठे-कठे घणो जोरदार मेह बरसबा री संभावना है। अजमेर, जोधपुर, जयपुर अर भरतपुर संभाग मांय ई कठे-कठे मझला ऊँ तेज दर्जा री बारिश व्हे सके है। इण ने ध्यान राखता थकां किसानां ने खुला मांय पड्या अनाज अर खेती री जिन्सां ने गीली व्हेवण ऊँ बचावण री राय दीरीजी है। मौसम केन्द्र जयपुर रा निदेशक राधेश्याम शर्मा बतायो के प्रदेश मांय आवता तीन-चार दिन बिरखा रा मौसम रहवण रा आसार है, जिण ऊँ पारो उतरेला।

ई बीचे भीलवाड़ा जिला मांय आज संवारे ऊं ई रिमझिम बारिश व्हे रही है। कृषि विभाग रा संयुक्त निदेशक विनोद कुमार जैन ई बिरखा ने ई महीना रा पहला सप्ताह मांय बोई ज्यी सरसों, चणा अर तारामीरा सरीखी साखां सारू वरदान बतायी है। वे कह्यो के आवता एक-दो दिन मांय और बरसात व्हेवण री सूरत मांय किसान बिना पाणत गोहूँ अर जौ री बुवाई सरू कर सके है।

000

दौसा री श्यालावास जेल मांय राष्ट्रीय एकता दिवस रा सिलसिला मांय कैदी लौहपुरुष सरदार वल्लभभाई पटेल री गारा री मूरत बणायी है। जेल अधीक्षक पारस जांगिड़ आ जाणकारी दीनी। वे बतायो के आ मूरत जेल रा आंगणा री मिट्टी ऊँ बणायी ज्यी है। जेल मांय राष्ट्रीय एकता दिवस रा सिलसिला मांय शपथ ग्रहण, नुक्कड़ नाटक अर एकता परेड सरीखा कार्यक्रम ई राख्या जावेला।

000

भ्रष्टाचार निरोधक ब्यूरो आज चूरू जिला री सरदार शहर तहसील रा दफ़तर मांय सहायक प्रशासनिक अधिकारी निर्मल सोनी ने नब्बे हजार रुपया री घूस लेता थकां रंग्या हाथां पकड़ लीनो। वां माथे खेती री ज़मीं रो रूपान्तरण करण री एवज मांय खुद अर तहसीलदार सारू घूस री रकम मांगण रो आरोप है। एसीबी आरोपिता अहलकार ऊँ पूछताछ कर रही है।

000